

書炎以來野乘記



建炎以來朝野雜記

著者：（宋）李心傳

出版者：江蘇廣陵古籍刻印社

印刷者：揚州市古籍書店

定價：玉扣紙本七十元

出版時間：一九八一年九月

統一書號：一一一。〇。四

朝

𠂔

野

卅

𨾏

𨾏

建炎以來朝野雜記序

心傳年十四五時侍先君子官行都頗得竊窺玉牒所藏金匱石室之副退而過庭則獲剽聞名卿才大夫之議論每念渡江以來紀載未備使明君良臣名儒猛將之行事猶鬱而未彰至於七十年閒兵戎財賦之源流禮樂制度之因革有司之傳往往失墜甚可惜也乃緝建炎至今朝野所聞之事凡有涉一時之利害與諸人之得失者分門著錄起丁未迄壬戌以類相從凡六百有五事勒爲二十卷或謂心傳曰子之是書固學者之所宜究心也況言人之善而不及其惡記人之功而不錄其過是書之行於世也則宜雖然子以論著之餘而記見聞之故凡有所取則未及乎取者必以爲見遺

凡有所揚則不足乎揚者必疑其見抑吾懼夫兩端之怨詈將不得免于安用此其以賈禍也可不慮哉心傳謝曰下國山野之人上而名卿才大夫下而巖穴幽棲之士其未之識者眾矣遠而朝廷四方久而二萬七千八百四十有八旬之事其未聞與未知者亦不少矣事苟有所略人苟有所遺蓋孤陋寡聞之罪非敢去取乎其閒也學有所得屢書不一書而后已可乎哉既以告人遂筆其辭于編首嘉泰二年冬十月晦秀巖野人李心傳伯微甫序

建炎以來朝野雜記

提要

臣等謹案建炎以來朝野雜記四十卷宋李心傳撰心傳字微之井研人官至禮部侍郎事蹟具宋史儒林傳心傳長於史學凡朝章國典多所諳悉是書取南渡以後事跡分門編類甲集二十卷分上德郊廟典禮制作朝事時事故事雜事官制取士財賦兵馬邊防十三門乙集二十卷少郊廟一門而末卷別出邊事亦十三門每門各分子目雖以雜記爲名其體實例同會要蓋與建炎以來繫年要錄互相經緯者也甲集成於嘉泰二年乙集成於嘉定九年書前各自有序周密齊東野語

嘗論所載趙師畢犬吠乃鄭斗所造以報撻武學生之
憤許及之屈膝費士寅狗竇亦皆不得志報私讐者撰
造醜詆所謂韓侂冑僭逆之類悉無其實云云蓋掇拾
羣言失真者固亦不免然於高孝光寧四朝禮樂刑政
之大以及職官科舉兵農食貨無不該具首尾完贍多
有馬端臨文獻通考章俊卿山堂考索及宋史諸志所
未載故通考稱爲南渡以來野史之最詳者王士禎居
易錄亦稱其大綱細目粲然悉備爲史家之巨擘言宋
事者當必於是有徵焉其書在宋有成都辛氏刊本並
冠以國史本傳暨宣取繫年要錄指揮數通今惟寫本
僅存案張端義貴耳三集序稱心傳告以朝野雜記丁

戊二集將成則是書尙不止於甲乙二集而書錄解題
及宋史本傳均未之及殆以晚年所輯書雖成而未出
故世不得見歟

建炎以來朝野雜記卷一

甲集

宋李心傳撰

上德

后妃王主
宗室附

高宗誕聖

高宗受命中興全功至德聖神文武昭仁憲孝皇帝諱構字

德基徽宗第九子母曰韋太后大觀元年五月二十夜生於

宮中

以其日爲
天申節

八月封蜀國公二年正月進廣平郡王宣和

三年十二月封康王靖康元年十一月被旨使河北金人軍

前議和閏月至相州除河北兵馬大元帥二年五月朔卽皇

帝位於南京改元建炎十月幸揚州三年二月渡江幸杭州

四月進幸江寧八月復幸臨安十二月自明州幸海四年正

月幸温州四月進幸越州紹興二年正月又幸臨安四年十月又進幸平江五年二月還臨安六年九月又幸平江七年四月進幸建康八年三月復還臨安在位三十六年建炎四紹興三十遜位二十五年淳熙十四年十月八日崩於德壽宮壽八十五十五年二月權殯永思陵初年二十一遜位五十六

孝宗誕聖

孝宗紹統同道冠德昭功哲文神武明聖成孝皇帝諱昀字

元永高宗第二子建炎元年十月二十二日生於嘉興府

以其

曰爲會慶節

初名伯琮紹興二年五月鞠於宮中三年二月除貴

州防禦使賜名瑗五年六月封建國公十二年正月進封普安郡王三十年二月立爲皇子封建王更名瑋四月賜字元

環三十一年十二月扈從幸建康三十二年二月還臨安五月立爲皇太子更今諱六月十一日受內禪卽皇帝位在位二十七年隆興二乾道九遜位五年紹熙五年六月九日崩於重華宮壽六十八權殯永阜陵初年三十六遜位六十三

光宗誕聖

光宗憲仁聖哲慈孝皇帝諱惇孝宗第三子母曰郭皇后紹興十七年九月四日生於藩邸以其日爲重明節二十年二月授右

監門衛率府副率三十年五月轉榮州刺史三十二年九月封恭王乾道七年二月立爲皇太子四月領臨安尹九年四月解尹事淳熙十四年十一月參決機務十五年正月赴議事堂與宰執議事又詔每遇朝殿令侍立十六年二月二日

受內禪卽皇帝位在位五年紹遜位六年慶元六年八月八

日崩於壽康宮壽五十四其年十二月權殯永崇陵初年四

位四
十八

寧宗誕聖

寧宗皇帝名擴光宗第二子母曰李皇后乾道四年十月二

十日生於恭王府

以其日爲瑞慶節

五年十一月除右千牛衛大將

軍淳熙五年十月封英國公十二年三月進平陽郡王十六

年三月封嘉王紹熙五年七月五日奉太皇太后聖旨就重

華宮卽皇帝位

初年二
十七

壽康宮進香

上始受禪趙子直議以祕書省爲泰安宮已而不果乃以慈

懿皇后外第爲之會光宗不欲也因以舊福寧殿爲壽康宮而更建福寧殿上之在重華執喪也五日一朝於壽康時光宗聖體未平猶不得見慶元四年八月丙戌詔恭聞上皇聖躬悉已清復將率羣臣詣宮上壽旣而不克行五年八月丙戌以重明節前十日上初詣壽康宮進香詔書降諸道流罪以下囚釋杖以下京官大父母父母年八十選人小使臣大父母父母年九十庶人百歲並與官封致仕官員郎年八十賜服三品餘官七十服緋綠及十年並改賜民有大父母父母年九十以上免身丁錢諸道贓賞錢悉蠲之加賜行在諸軍如雪寒錢例宰輔皆進官一等特進右丞相祁國公京鎰爲少保封鄭國公少傅保寧軍節度使萬壽觀使韓侂冑爲

少師封平原郡王太皇太后弟保順軍節度使提舉祐神觀
謝淵爲太尉太上皇后姪昭信軍承宣使知閤門事李孝友
保信軍承宣使知閤門事李孝純並除節度使入內侍省
押班甘晷以兩宮宣力備竭忠勤特遷二官其餘次第行賞

孝宗諸孫

孝宗皇帝五孫莊文太子下曰豫國公挺魏惠憲王下曰左
千牛衛大將軍攄次吳興郡王柄光宗皇帝下曰保寧節度
使挺次寧宗挺攄挺皆蚤卒寧宗四子其長者紹熙四年春
生於嘉邸時光宗已屬疾而子亦早夭故不及名旣受禪恭
淑皇后生兗沖惠王峻邠沖溫王垣楊貴妃生郢沖美王增
皆不育吳興一子曰楚州團練使垓生三歲而天慶元五年

四月追賜名贈官云

慶元育宗子

上旣失堯王戊午歲用高宗故事取燕王宮希字行之子與
愿鞠之宮中已而連失邠郢二王庚申冬遂以爲觀察使賜
名囁云

高宗恭儉

高宗在維揚時每退朝卽御殿旁一小閣垂簾獨坐前設一
素木卓子上置筆硯蓋閱四方章奏於此閣內惟二小璫侍
側凡巨璫若內夫人奏事上悉出閣外視之御膳惟麪飯煎
肉炊餅而已鎮江守錢伯言嘗獻宣和所留器用其閒有螺
鈿椅卓上惡其靡亟命於通衢毀之上晚年大劉妃有寵恃

恩驕侈盛夏以水晶飾足蹋上偶見之卽命取其一以爲御枕妃惶懼撤去自是六宮無復踰制者矣

高宗聖學

紹興末上嘗作損齋屏去玩好置經史古書其中以爲燕坐之所上早年謂輔臣曰朕居宮中自有日課早閱章疏午後讀春秋史記夜讀尙書率以二鼓罷尤好左氏春秋每二十四日而讀一過胡康侯進春秋解上置之坐側甚愛重之又悉書六經刻石寘首善閣下及作損齋上亦老矣因自爲之記刻石以賜近臣焉

孝宗聖孝

二事

辛巳歲上視師建康建王實從每早晚二頓必具上起居食

飲狀及羣臣進對中外關奏之事以達中宮逮還都隆慈出示其書盈篋上見之大喜

孝宗天資純孝初授禪高宗駕之德壽宮上步出祥曦殿門掖輦以行及宮門乃止翊日過宮屬天新雨泥淖被路上皇命邀乘輿至殿門上亟駐輦門外趨立庭下上皇嘉歎久之曰每見吾兒則喜不自勝隆興初上以兵連不解未克盡兩宮之奉乾道元年二月朔始從兩宮謁四聖觀上親扶上皇上馬都人驩呼以爲所未嘗見此可謂以天下養矣

孝宗恭儉

淳熙中上作翠寒堂於禁中以日本國松木爲之不施丹牒其白如象齒嘗召趙丞相雄王樞使淮奏事堂下古松數十